

鄧川州志

第六冊

鄧川州志卷之十二

署牧烏程鈕方圖賡雲定

州人

楊柄鏗春樵輯
侯允欽雲坡纂

人物志

昔司馬相如通叩竿夷盛覽張叔以樸榆人至若水受
學歸教鄉里惟時鄧亦樸榆地也文教既倡當有聞風
興起者惜乎其不傳矣唐蒙腥羶狶奔豕突而慈善大
節獨炳千秋宋代否塞山川黯淡有元一代未盡廓清
至明而理學名儒出焉

國朝治化光昭羣英蔚起文章德業固已埒美前修卽至

里閭間敦孝義重名節幽光懿烈所留均有灼然難泯
者夫風俗之隆替於人物徵之人物之盛衰惟教化寔
之所關不綦重歟

鄉賢

舊志於鄉賢紀六人後紀十人考祠中所祀五人名與
實先與後均互異何歟竊嘗思之賢謂之鄉非邑之人
弗與也非邑之人隸邑之庠弗協也邑之人皆曰賢弗
請題缺典也循名覈實可以審所擇焉

明

楊宗道上登里人善辭賦崇孝友正統間巡按趙公聞其賢以明經辟舉授州學訓導陞浪穹縣教諭入祀鄉賢祠

贊曰明代徵車四出懷瑾握瑜之彥耀晃藻焉然皆在通都大邑間荒陬僻壤寂無聞矣幽英鬱發有開必先則吾邑袖領羣倫實自先生始

楊南金字本重號用章玉泉鄉人宏治己未進士授江西泰和令直節惠政民有三不動之稱謂刁詐脅不動財利惑不動權豪撼不動擢御史值逆瑾之黨劉宇任

都憲欲鉗言官口公疏論之且入堂抗直不屈宇欲縛之遽解官服曰不做此官便了豈可屈於權奸乎指叱而出卽日出都門行二百里瑾遣人追之不及除其籍嘉靖初詔起湖廣僉事晉叅議尋乞歸卜築三宜亭居之曰宜休宜足宜止左鑄濯纓右鑄攻玉故號曰雨依公性嚴重居鄉抑奸扶良井里賴之著有碑鄉集守土訓三教論等言並纂州志然皆散失無存矣年八十卒提學胡公堯時造廬恤其孤作祠祀之建石坊於其里曰清風高節入祀鄉賢祠

贊曰公以疏逖小臣值璫焰熏天時廷爭不一屈何
風骨之峻也所尤難及者掛冠疾走如鴻飛冥冥而
莫可條羈則更神勇矣否則有不罹於毒焰哉世傳
公歸里後於石室中著隱語道數百年後事如燭照
而龜計咸謂公有神術嗚呼公豈可以凡人測哉百
世下聞風者尙可令頑夫廉而懦夫立也

艾自新字師湯號雲蒼生而沉靜少卽以希聖爲志年
十四游邑庠研心性理歎曰千聖道統旨歸在敬敬只
在慎獨慎獨工夫真是與鬼神交通於是日間有所言

行悉筆之省身錄不可筆者不言行也萬厯間以選

拔貢成均未幾抱病猶汲汲著希聖錄謂向來爲舉業

累用志多紛到此則一念不生炯然覺去聖賢不遠尋

卒祭酒曾公朝節索所著作觀之泣曰如斯見地其企

於聖賢無疑天柰何靳之哉爲立傳表其賢刊所著語

錄賻歸其喪且移咨滇撫陳公用賓檄州入祀鄉賢祠

錄其妻子妻何氏年甫二十六守節終身語在列女志

大中丞毓台陳公謂先生之學宜與敬齋白沙爭流豈

特一鄉一國善士已哉東越周海門輯聖學宗傳溯自

伏羲迄於明季周蕙先生與焉其弟爲雪蒼云

贊曰昔張子橫渠謂二程於十四五歲時卽銳志學
爲聖人以先生年譜考之何智慧之相肖也曾大司
成有言曰余兩典會試得士若干人不如得一艾生
蓋是時先生之沒年甫二十有九耳而希聖一書已
有追跡關閩濂洛處鳴呼偉哉

艾自修號雪蒼自新第性孝友與兄讀書禪舍夜必焚
香祝二親壽中萬厯庚子舉人由縣令擢湖南辰州牧
所至有惠政居艱歸里廬墓六載墓旁甘泉湧出人名

之曰孝感先是邑有銀廠數處額課極重久而山空徒
散歲令地方代賠民苦之公訴之毓台中丞免額大半
民緣累逃亡者咸復業晚歲值明末造科派繁興誅求
無藝迤西土民有激變戕官者各屬人情洶洶公上書
當道大畧謂曰前救弊之要曰緩征賦減火耗禁濫訟
革猾吏指陳痛切上臺咸嘉納焉大理太和鄧川三庠
敦請講學申明三綱五常娓娓數千言三庠人士悉受
陶鎔督學邵公檄府行州旌額曰當代賢儒詔進四品
大夫嘗建紫雲寺爲棲息所修邑中興文寶塔著有雪

蒼語錄行世纂輯州志年八十餘卒

贊曰公性嚴正讀所纂州志雖衆手雜糅而色正芒寒有深秋霜肅氣象抑匪獨言焉已也震聳竅曠其挽狂瀾於波靡之餘者尤汲汲懔懔莫可掩焉

阿朝藩土官舍人有隱德人比之魯男子孝事繼母撫孤姪好施藥餌棺槨以濟貧授滇庠訓導却贊見儀厯署武定陸涼儒學移建豐宮遷江川教諭置祭田祭器後以子天麒貴贈石阡府知府入祀鄉賢祠

贊曰末世偷薄成風斗粟尺布有吝色好行其德者

鮮矣夫煦煦子子之行聖賢弗尙然孟子不云乎惻
隱之心仁之端也羞惡之心義之端也擴而充之量
且無窮公其近是者哉

徐震州人隸太和縣庠隆慶庚午舉於鄉官至福建汀
州府通判有冰檠聲里居仍以清節勵風俗鄉黨重之
贊曰公之事蹟前書記載止此耳舊謂入祀太和鄉
賢祠意當日請題時必多志行絕特嘖嘖爲人稱道
者文殘獻佚莫由徵信可勝嘆哉

高上桂號月峯州銀橋人由乾隆癸未進士授四川新繁縣令歷任河南輝縣太康等縣知縣擢陞湖南茶陵州廉幹慈惠所至有循良聲居艱歸里首捐千金與郡伯張公春芳署牧王公孝治疏東川水尾使歷年湖水入河之患悉暢洩無滯環湖涸出膏壤無數井里德之嘗置高豐莊以贍族年七十餘卒於茶陵任所著有詩文詞賦待刊纂州志子焜遵例歷任江西上猶奉賢等縣知縣孫文彬候選縣丞

贊曰東川子河之績懋矣否則公之蒿目於雲水蒼

登人少元 卷十二
茫者有不長歎其爲魚乎余謂被公之澤者宜專祠
與張王兩公同祀卽黌門俎豆躋班行於兩依雲蒼
亦協焉嗚呼邑有先正後學楷規也雖不能至然嚮
往之心靡窮矣

卓行

中行難得聖人慨之漢之獨行傳唐之卓行傳所由作
也夫一鄉一邑固未可與一代之英相頡頏顧其間或
行表言坊爲鄉里所矜式或懷清履潔懋爾室之潛修
或古處敦任恤之風或作育溥春風之化皆可以維風

俗正人心列而編之以世次之先後爲序

明

楊禮性清剛而不谿刻凡邑有水利婚喪難舉者輒倡
首捐助鄉人感其德惠尤欽其正直訓迪子弟化導鄉
里勤勤不倦年七十七沐浴拜天而逝卽御史兩依之
祖父禮之子彥亦有乃父風

杜彥亨宏治間玉泉鄉大水淹斃人民無數拾而葬之
高原計埋前後無主遺骸四十有七復建各處橋梁倡
修學宮

艾傳芳嘗濟困憐貧貸財與人察其不能償者檢券焚之滿百紙不令人知卽雲蒼雪蒼祖父

楊韶萬厯戊子舉人懷抱清超不求進仕凡橋梁道路有傾圯崎嶇者修之濟困扶危無倦色壽至九十有三李斯文貢生僑居太和忠信純篤一介不取尤敦孝友躬耕隴畝不求聞達

倪高魁學通三教日惟閉門訓課子姪廛市喧囂之處足跡不至

徐進卿崇禎丙子舉人與兄上卿姪延熙敦睦尙義值

歲飢疫癘並作道殣相望進卿發莊穀溥賑諸窮困寒
冬無褐者衣之歲盡除夕以布袋百條載米餅分投貧
乏家不令知前賢表之以風世

國朝

王詢字曙東康熙甲午舉人天資醇篤友孝性成父歿
事母色養備至與弟讓產推財無私蓄至其和以接物
狷以持身尤爲井里所欽佩

阿炯晟庠生壯歲喪妻遺二子遂不復娶平居崇尚古
道敦樸黜華敬宗睦族至於安貧嗜學至老不倦尤爲

人所推尊

張翊積學未售言動不苟時以爲善勸勉鄉人年臻耄耄卽葉洲明府之祖父

高上柱字辰遠庠生學問淹雅襟懷高曠食貧居陋人所不堪而處之怡然年八十猶作蠅頭小楷文學爲一鄉之望

杜啟元字易菴貢生宏材績學屢見賞於宗工生平博極羣書尤精研性理著有四書輯義稿惜皆散失

侯于晉字太原貢生持品端方績學深邃尤工書法縱